



# Weesgerus 14-21 Junie 2015



Wie kamp nou in die winter? S.A.W.A. doen! Met die wonderlike keuse van Weesgerus oord in die ou Nylstroom. Met heerlike warm sonskyn dae en verhitte swembad, was dit definitief 'n goeie besluit. Dit was 'n Jakaranda Gebiedskamp en van die 43 woonwaens was 14 Rietvalleiers! Chris en Ansie Delport asook Pieter en Johanna van Biljon was kampkommandante en hulle het hulle somer baie goed van hul taak gekwyt. Met aankoms het ons sjerrie en "wit goud" ontvang.

Van die Sawanante het somer vir die hele week gaan kamp! Met die oord se spesiale tariewe was dit die moeite werd! Die vooraf week was ook reeds propvol aktiwiteite asook die gebruiklike Boekevat elke dag.

Maandag is daar pannekoek gemaak en verkoop. Woensdag is daar potjiekos gemaak en Donderdag oggend heerlike brunch. Vrydagaand was daar vetkoek en maalvleis verkoop vir die wat vir die naweek kom kamp en nie nog wil kosmaak na die opslaan nie.

Saterdag oggend is kermis gehou met pannekoek, boereworsbroodjies, nagereg en 'n allerlei tafel. Die Rietvalleiers het ook somer ingespring en gehelp met die nagereg verkope. Dankie aan elkeen wat gehelp het op enige manier! Hoe klein ook al, dit word raakgesien en waardeer. Die aand is daar 'n saambraai! Vure, pap en sous is voorsien. Daar is heerlik gekuier en geet om die vure.

Sondag oggend het 'n plaaslike predikant vir ons die Erediens kom behartig. Daarna is nog onder die bome gekuier en toe traag-traag oppak en terug gesleep huis toe.

Dankie aan die kampkommandante vir al die reëlings en beplanning. Dit was 'n baie aangename winterskamp!

